

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

APERILA 2021

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

MALUMALU EFKS TOOMATAGI



*Susuga Rimoni FS & Laepa Wright,
Feagaiga, EFKS Matautu Falelatai.*



*Susuga Enoka FS & Susi Aperaamo
Feagaiga, EFKS Papa Puleia.*

FAASINO UPU

1. O LE LAUGA 2
2. OSIGA FEAGAIGA EFKS MATAUTU 4
3. OSIGA FEAGAIGA EFKS PAPA 5
4. FAAFETAIA LE EFKS AVAO 6
5. MALUMALU EFKS TOOMATAGI 8
6. TATOU MEA'AI TATAU MA LE ASO 9
8. O E UAFAI LAGI FOLAUGA 12
9. IAAGALELEIATU 13

.....

O LE LAUGA

Feagaiga Tuai: Kenese13: 1 – 18

Feagaiga Fou: Mātaio 5: 43 - 48.

Matua: *“⁸Ona fai atu lea o Aperamo ia Lota, ‘Aua lava ne’i femisaa’i i tā’ua, po o ā tā’ua leoleo manu; auā o le uso i ta’ua.”*

Manatu Autū: **O lalo lava e maua ai mālō.**

O lo’o tatou ola ma soifua i se lalolagi o vevesi ma fevaevaea’iga. E maua ia vevesi i soo se vaipanoa o loo tatou ola ma feoa’i ai. E maua i totonu o āiga, e maua i totonu o galuega, e maua fo’i i totonu o faigāmālō. O vevesi e a’afia ai le ola i lā le tino, auā e ono āfāina ai se vaega o le tino pe a oo ina pā’ilima ma fa’aaogāina ni au’upega e fa’amalie ai le ita ma le ma’ema’eā o le tasi i le isi. E mātua aafia ai fo’i lagona i le loto, auā o inā e āfua mai ai māfaufauga e fa’aosofia ai le tino e faia ni gaiioiga, e tau i atu ai lagona tīgā ua totogo a’e ona o se vevesi. E mātuiā vevesi ua tutupu mai i lō tatou atunu’u i lenei vaitaimi – ua māumau ai le soifua ma le ola o fānau a le Atua ona o fetaliaiga i loto ua tīgā, ma ua leai ai se nofo lelei o fānau ma āiga, o nu’u ma itūmālō ae ā le atunu’u atoa. Lea foi ua aliali mai i le faigā filifiliga a si o tatou atunu’u na se’i mavae atu nei ua leai se loto se’i alu ifo i lalo e saili le filemū o le Ali’i, ma sei fesili i le Atua mo se auala e nofo lelei ai lana fanau, a o taumafai mai le fili e lepetia lona mālō o ia Samoa.

O le tala ia Aperamo ma le atali’i o lona uso o Arana-le tama o Lota, ina ua aga’i atu e faia le finagalo o le Atua na tuu atu ia Aperamo. Ia tu’ua e ia lona nu’u, ma tagata o lona nu’u, ma le āiga o lona tamā, ae alu atu i se nu’u e faasino mai e le Atua ia te ia.

O le finagalo lea o le Atua mo Aperamo, ina ia fa’ailoa atu i ai le feagaiga – o le’a fai o ia ma tupuga o nu’u tele. Ua taunu’u le malaga a Aperamo ma

Lota i Peteli, o le nofoaga ua masani ai Aperamo, auā o le nu’u lea sa ia mua’i faatuina ai lona fale’ie, ma o le nofoaga foi na ia faia ai le uluai fata-faitaulaga mo le Ali’i. Sa tele oloa a Aperamo na ave i le malaga lea, o ana manu ma ario ma auro. Ae faapēnā foi Lota – o āna mamoe, o povi ma āna fale’ie. O le faamatalaga a le tusitala - ua lē mafai ona lā mau fa’atasi, ona o le tele o a lā’ua mea. Lona uiga ua alu lō lā taimi i le taumafaiga o a lā atina’e, auā le va’aiga lelei o a lā manū, aemaise ai o fale’ie ma auro ma ario. E pei lava o le aga masani a le tagata – e taumafai ina ia tupu ma ola lelei lafumanu ma atina’e, auā se lumana’i manuia o āiga ma fānau. Peita’i le mafutaga a Aperamo ma Lota – ua atina’e lava le tagata ia, ma ua lē maua ai se taimi e lā te mafuta lelei ai, ma talanoa i mea o lō latou foi āiga. Ua ave le tele o mea ua i o lā lima e ala i lafumanu ma isi oloa, ua fai ma auala e tupu ae ai se fe’ese’esea’iga i le vā o ā lā’ua tausi manu. O tagata ia o loo leoleoina a lā’ua lafumanu, ma fafaga ma tausi ina ia malolosi.

O le tala ua aumai – ua tele a lā manu, ua fōliga mai foi ua lē lava le vao o le fanua e tausi ai manu, ma ua taufao ai leoleo manu a Aperamo ma Lota i vao falī, auā le tausiga o mamoe ma povi, ma manu uma o a lā’ua lafu. O le isi foi itū o lea vevesi, ua lē lava le fanua, auā sa nonofo ai foi ma sā-Kananā ma tagata sā-Perisē. Lona uiga ua leai lava se vaipanoa e faalautele ma maua ai ni vao lelei mo manu a i lā’ua. Ua faigatā foi lā i leoleo manu. O se vevesi ma se fe’ese’esea’iga na iloa ma matauina e Aperamo, ma o lea na taumafai ai loa Aperamo e faia i ai se fa’ataua. Ua ia mālmalama lelei, a oo ina faatuputeleina le vevesi lea i le vā o leoleo manu a Lota ma ana leoleo manu, lona uiga e i’u ina fa’ama’ite mai ai iinā se fe’ese’eseaiga i lō lā vā ma Lota le atalii o si ona uso. Auā o le mea moni lava, ua fai lava e Aperamo le atalii lea o lona uso, o se atalii moni mai lona mānava. O le fe’ese’eseaiga lā i le vā o leoleo manu na tonu ai i le māfaufau o Aperamo, o le a ia faia se auala e fo’ia ai le faafitāuli ua tūlai mai. E pei ona aumai e le tatou matua le tala a Aperamo na fai, o lona taumafai lea ina ia taofi se fe’ese’eseaiga e ono tupu mai i lō lā vā ma Lota. Auā o le mea moni lava o faafitāuli faapenei, e au lava ina vevesi ai ē o fai ma taitai o nei lafu manu o Aperamo lea ma Lota. O le tala a Aperamo, *“Ia ‘aua lava ne’i femisaa’i i tā’ua, auā o le uso i tā’ua.”* Talofa e i le sāili mālō o lenei tamā, auā e ui

lava ina laitiiti Lota, o le atalii foi o lona uso, e lē feagai foi Lota ma le tamā iā Aperamo, a ua faamaite lava Aperamo i se auala e maua ai lō lā nofo lelei pea ma le atalii o si ona uso. O le mea moni lava i nei aso ma mea o tutupu mai – ua mātua’i leiloa lava e le uso le uso, le tuafāfine le tuagane, ma isi e so’o toto, ivi ma a’ano – ua galo uma ia mea pe’a o’o ina tutupu mai ni feeseeseaiga i totonu o āiga ma nu’u. Ua ave le faamuamua a le tagata ia i lona lava lotoifale ma āna atinae ma ona tamāoāiga, ae ua leai se vaai i le nofo lelei ma le fealofani na taumafai mai ai nai mātua ua lagomau mai tūugamau. O le manatu o Aperamo - afai ae nofo’ese’ese i lāua ma Lota, o se auala lelei tele lea e atia’e ai lava le tagata ia, a ia maua lō lā māfanafana ma nonofo i le fiafia ma fealofani. A silasila fo’i ma tō manatu i le auala na faia e Aperamo, e na te lei fau-mālō ia Lota, auā sa ia tu’u i ai le avanoa e filifili muamua ai Lota i se fanua e loto i ai o ia. Na ave e Aperamo le avanoa ia Lota e filifili ai o ia -afai e filifili e ia le itū tauagavale, o le a alu Aperamo i le itū taumatau. Afai e alu i le itū taumatau, o le a alu Aperamo i le itū agavale.

Na faia le filifiliga a Lota i le laufanua e sili atu lona laugatasi ma le lafulēmū, ae filifili e Aperamo le laufanua na le’i filifilia e Lota. A tuu mai i le tatou aganuu ma le nonofo ai o le tamā ma le fānau - e faasino e le tamā i le fānau se fanua e aga’i i ai. Peita i le vā o Aperamo ma le atalii o lona uso, sa le’i i ai se manatu ma ni lagona fa’apea o Aperamo, sa maualuga i lona māfafau lō lā nofo lelei ma Lota. E le’i popole foi Aperamo po o le ā le itūāiga laufanua e na te mauaina, pau le mea sili i lona māfafau , o le maua o lō lā nofo lelei ma Lota. A va’ ai i le āuli’iliina mai o laufanua ma tagata o lo’o nonofo ai, e tulaga ‘ese le laufanua na filifili e Lota, auā o le laufanua laugatasi na agai i ai Lota, sa tau lava i Sotoma, le nu’u o nonofo ai tagata agasala. A o Aperamo, na aga’i i le laufanua ua tusa ma le finagalo o le Ali’i – o se laueleele o le a fai mo ia e oo i le a tupuga mai ia te ia, ma o le’a leai se tasi e mafai ona ia faitauina tagata o le’a tupuga mai ia te ia. O le fesili e mafai ona tatou fesili ai – Pe le o le tau i ea lea o le tagata e na te faama’ite se filemū ma se nofo lelei o fānau a le Atua? E le o āfāina lava Lota ma lana filifiliga i se manatu, auā o lana lava filifiliga na faia, lea ua aga’i ai e mafuta āna leoleo manu ma lana āvā i laufanua e tau atu i Sotoma le nu’u agasala i luma o le Atua. A’o le filifiliga a Aperamo – o se manuia ma se tau i lea mo ia, ona o lona aumai o le filemū i lō lā vā ma

Lota. E le’i manatu pe vaai o ia i se fanua e laugatasi ma lafulēmū, e le’i manatu foi e faamalie ni ona mana’o auā lana lafumanu ma ni ona tamāoiga. Sa ia ave lava le avanoa e faamalie ai Lota – o se atalii e pele ia te ia, aemaise si ona uso o Arana ua maliu. Maeu le loto maulalo o lenei tamā o Aperamo, auā ana tuu mai o tatou o loo aliali ane ai nei vevesi i le vā o leoleo manu, e leai lava se isi e fia toilalo. Leaga ua malosi le ‘oa ma le pule, ua naunau uma tagata e ‘ausia ia mea ona o le fia fai vīiga. Ua mana’o le tagata e avatu ia te ia le vīiga - o le mea e na o le Atua e ave i ai, na o la lava.

Silasila i le lāuga a Iesū i lug ao le mauga, o lo o fetalai lava o la i le vā faale-tagata, ina ia nofo lelei le fānau a le Atua. Ia alolofa atu i ē ua ita mai ia te outou, ia outou tatalo foi mo ē ua faasauā mai ia te outou; ina ia faia outou ma atalii o lō outou Tamā oi le lagi. E maoa’e le tele o vevesi o lo’o tutupu mai i le lalolagi. O vevesi ua mautinoa ona o le leai o se mafutaga vā vā lalata a le tagata ma le Atua. O loo vaaia pea fetauaiga i atunuu i fafo ona o le sāliliga o le pule ma tamāoāiga. Ua fetaua’i foi mālō ona o talitonuga eseese i tapuaiga ma Ekalesia. A o lā Iesū – *“Amuia ē sauāina ona o le amiotonu; auā e o latou le mālō o le Atua.”* O loo faamālosi’au foi le Ali’i mo i latou e ‘upu leagaina ma sauāina, o le ta’u pepeloina i mea leaga uma ona o le Ali’i, o loo faa-Amuia i ai le Ali’i.

Le au faitau Sulu i lenei masina – o le fa’amanatu lea a le Talalelei a Keriso mo i tatou. E le ‘asa lō tatou ola ma vevesi e ālia’e mai, ma e taga eseese foi māfuaaga o nei vevesi. Pōo ai ea o le a tūla’i mai e na te fofō nei vevesi pe a tūla’i mai? Ioe le āiga e o le Atua, o lea ua mutia le ala o le Talalelei i lō tatou lotoifale faale-āiga, faale-nu’u ma lō tatou atunuu. Ua ao foi si o tatou mālō i le Talalelei a le Atua. O oe lava ma a’u, o tāua lava e fofō alamea i vevesi pe a tutupu mai. Ae faafefea ona fofō? Ioe, o lalo lava le fofō. O le loto maulalo lava, aveese lō tatou manatu toilalo ma lagona o le ta’u māmāina i le vaaiga faale-tagata, auā o loo silasila fofoga o le Atua i o tatou loto e āfua mai ai lō tatou taumafai atu mo se filemū. Ioe, e ta’ua i tatou o atalii o le Atua ina ua tatou faatupuina le filemū. Sāmoa e, lo’u atunuu pele, e maeu foi nei vevesi ma fetalaiiga ina ua mavae atu le faiga filifiliga a le atunuu e ala i lana palota. Ma ua leai lava se taitai o itū e lua faama’ite ma laga’ia se lagona faa-Aperamo, e sāliliga se auala e nofo filemū ai auā ā lāua leoleo manu. (*Fa’auma itulau 11*)

OSIGA FEAGAIGA EFKS MATAUTU FALELATAI

“⁵A o oe, ia e faautauta i mea uma lava, ia e onosai i mea e tiga ai, ia e fai le galuega a lē folafola le tala lelei, ia e matuā faaiiuna lau faiva.” 2 Timo. 4.

O le susuga Caesar Samuelu FT, le toeaina o le Pulega Falelatai ma Samatau, na taitaiina le sauniga o le Osiga Feagaiga a le EFKS Matautu Falelatai ma lo latou faifeau, le susuga Rimoni Wright FS ma le faletua ia Laepa i le Aso Tofi 1 Aperila 2021. O susuga Andrew Laufiso FS (EFKS Si’ufaga) na saunia Tatalo, a o Julius Fruean FS (EFKS Samatau) na faitauina le Tusi Paia ma saunia le Lauga. O le Afioga i le Ao mamalu o le Malo, le susuga i le A’oa’o Fesoasoani ia Tuimalealiifano Vaaletoa Sualauvi II na saunoa fai ma sui o le Ekalesia i la latou filifiliga sa faalagolago tasi i le fesoasoani mai o le Agaga o le Atua. O lana molimau na amata mai le aso 21 Iulai 2019, na latou faamavae ai ma lo latou tofi talu ai, le susuga Tautiaga Senara FT & Olita, ona latou tausia lea ma uso A’oa’o Fesoasoani le galuega. Aso Sa 8 Mati 2020 na fai ai la latou palota i faifeau toatolu, manumalo ai Rimoni e 68 ana palota (o isi faifeau e ta’i 8 & 11). O le Aso Sa 15 Mati 2020 na faamaonia ai e le Toeaina ina ua 100% le autasi o le Ekalesia i le sa avea ma Teutupe a le Ekalesia. Na ia faafetaia le Ekalesia Aoa o le tofa ua faamatuu atu ai le afioga i le Teutupe e tusa o lo latou faamoemoe. Na faafetaia foi le faifeau ma le faletua i lo la’ua talia o le valaau, ma folafola ai o le a latou faamaoni i le tausiga o la latou feagaiga ua osia nei.

Sa tali fuaitau le susuga Rimoni faapea sa ia musumusua i le sui Komiti Tupe o Aana, ina ia alofagia i la’ua i le latou filifiliga, ae tali atu e faalagolago i le musumusuga a le Agaga Paia; na ia iloa ai e loloto le tofa ma le faautaga a lana afioga i le Ao mamalu o le Malo, e le seetia pe tosina gofie, e ui ina ua ta’utino sona mana’o. Sa la’ua nofo popole ma tatalo i aso uma pe a tua i fea le mana’o fai vavale, peitai lea ua aumai le tali, faafetai i le Atua, o ai le tagata ua Ia manatu mai i ai? Faafetai i le faautaga ma le faatofalaiga a le Ekalesia, faapea foi le Fono Tele i le talia o lana faamavaega ae le’i mae’a lelei le taimi e tatau ai ona tuua le nofoa i lenei nofoaiga. Sa ia folafola foi o le a taumafai i le mea e gata ai le malosi e fai le galuega a Keriso mo le manuia o le nuu ma le viiga o le Atua. O i la’ua foi ma le faletua ua na o ni tama vavale, e faamoemoe i le pulega mamalu a alii ma faipule e lagolago ina maopoopo ai le galuega o le a latou galulue faatasi ai.

Na silamalo le susuga i le Taitai o le Sauniga ma le mamalu o le tapuaiga i le o le Feagaiga na saunia e le Aulotu i Matautu faapea le paia o aiganalua, o le pine faamau mo feagaiga osi e tusa ma la tatou aganuu mamalu o lagolago ma tautuaina ai le Tala Lelei. Sa faamausali atili lenei feagaiga ina ua faatalofa, feiloai ma faamanuia i ai Tama o le Ekalesia: o le Taitaifono Fono Tele susuga Tunumoso Iosia FT & Sui Taitaifono susuga Iosefa Atapana Uilelea FT, o le afioga Taitaifono Komiti Au Toeaina susuga Asotasi Gu Time FT, o le Komiti Mataupu Tau le Aufaigaluega a le Matagaluega Aana, susuga Ailepata Leuta FT, ma le afioga i le Faipule o le Ekalesia Katoliko Roma i Matautu Falelatai. Na valaaulia foi lana afioga i le Tama Aiga Tuimalealiifano Vaaletoa’ a Sualauvi II, ma le nofo a Fa’aaloaloga sa auai i le tapuaiga, e faafeiloai atu i le feagaiga ma le faletua, a le Aiga Tauaana, le Falefitu ma Tula o Salogo, Galuefa ma Tagata o le Vavau.

O le Lauga na autu ma faamamafa le manatu o le TFA: IESU, FAI MA ATA O LE FAALUMAINA, auā o le aso tonu lea e masani ai le lalolagi i le Taufaaavalea (April Fool). O le aso na faalumalumaina ai le Alii ma taufaavalea solo e taitai Iutaia ma fitafita Roma, e taulagi o Ia o le Tupu ae faapale i le pale tuitui, o le sasa, feanu ma le ta, o faiga le taupulea uma a o lumanai lona faasatauroina. O le ata foi lea e oo i ai lana aufaigaluega i nisi aso, ma le galuega a le Tala Lelei i le matamata ita o le fili ma le lalolagi. E lu’itauina ai le faifeau ina ia mataala ma le onosa’i, ia faatuatua ma loto maualalo e fai le galuega faalagolago i le Alii e manuia ai. Sa faaopoopo foi le susuga i le Taitai, ma faamanatu i le faifeau le Faavae ma Iugafono Tumau, i le 2 o lotu i le Aso Sa, ma sauniga lotu i isi aso, o lotu a le Au Leoleo, Au Taumafai, faapea Aoga a le Fanau. O loo i ai foi isi mamoe o loo i fafo, e tatau ona aumai i totonu o le lotoā, ona tasi ai lea o le lafu e pei ona a’oa’o mai le Alii. Ia la’ua faamalosi i aso e taugalemu ai ma aso foi e louloua ai le tau, ma ia fai fiafia le galuega. Na faai’u le sauniga i le Sakarameta o le Faamanatuga na taitai e le susuga i le Faafeagaiga Rimoni Wright. E ui ina sa mamafa uaga o faamanuiaga i lea aso, ae sa taualuga fiafia i le tausamiga tele ma fa’aaloaloga maualuluga na ma’au i ai le afioga i le Ao mamalu o le Malo ma le Ekalesia. Ia manuia le galuega a feagai ai lau susuga le Faafeagaiga Rimoni ma le Faletua.

OSIGA FEAGAIGA EFKS PAPA PULEIA

“Ua le filifilia a’u e outou, a ua filifilia outou e a’u; ua ou tuuina atu foi outou, ia outou o, ma ia outou fua mai ni fua, ma ia tumau o outou fua...O la’u poloaiga leni ia te outou, ia outou fealofani.”

O le sauniga o le Osiga Feagaiga a le EFKS Papa Puleia ma lo latou faifeau fou, susuga Enoka Aperamo FS ma le faletua ia Susi, sa ta’ita’iina e le Toeaina o le Pulega Palauli, Leaso Tupa’i FT (EFKS Gautavai). O Tatalo na saunia foi e le Toeaina, o Mose Tanielu FS (EFKS Puleia) na faitauina le Tusi Paia, o le Lauga mo le Aulotu na saunia e Niulala Kupa FS (EFKS Tafua), a o le Lauga mo le Faifeau na saunia e Fereti Sefo FS (EFKS Vaitoomuli). Sa auai ma molimauina leni osiga feagaiga e susuga Toeaina o le Matagaluega Faasaleleaga ma latou Faletua - Ioane Viliamu Samoa FT (Pulega Safotulafai), Faasavala Leilua FT (Pulega Salega), Fiafia Toleafoa FT (pulega Amoa). Sa auai foi le susuga Palemia Tauiliili Reupena FT (Pulega Gaga’emauga, Itu o Tane), o Faifeau o le Matagaluega Faasaleleaga, le afioga i le Tiakono Toeaina o le Matagaluega Itu o Tane, a o le Sui Faipule o le Itumalo Gaga’emauga No.1, le afioga Seuamuli Fasi Toma ma le mamalu o aiganalua, o uo ma aumeamamae a le faifeau ma le faletua, ae maise le mamalu o le afioga i Papa Puleia.

O le afioga Faumuina Fei’i le A’oa’o Fesoasoani, na fai ma sui o le Aulotu e molimauina la latou faiga filifiliga sa fai e saili ai so latou faifeau. O le tausaga talu ai 2020 na latou faamavae ai ma lo latou tofi, susuga Faamanuia Fa’aaliga FS ina ua faamanavaina e le Atua ana feau. Ona tausia lea e susuga i A’oa’o Fesoasoani le galuega e faatali ai so latou tofi. Ma sa tuu atu lava i le Atua leni faamoemoe ina fesoasoani mai Lona Agaga ma faasino mai sana auaua na te tausia Lana lafu mamoe. Na faagasolo faiga filifiliga mai i’u ai ina tasi moemoe le faatofalaiga, ua autasi i le susuga i le faifeau o loo galue i le Ofisa Tutotonu o le Ekalesia i le Matagaluega A’oa’oga Kerisiano i le Vaega o Taaloga. Sa faapea foi ona faamaonia e le Toeaina la latou faai’uga, ma faia loa fesootaiga e pei o ala masani a le Ekalesia. Ua latou fiafia tele ma faafetai i le Atua, ina ua tali leleia mai lo latou mana’o e le susuga Enoka ma le Faletua. Ua na folafola foi i luma o le faapotopotoga ma le Pulega, o le a latou tausia lelei le auaua a le Atua, e ui ina to’a gaogao, e to’a 10 Matafale, ae latou te loto tetele i le faatasi mai o le Alii.

Sa tali fuaitau le susuga Enoka e fai ma sui o lo la’ua aiga, e tusa o la la’ua filifiliga, ma e le’i ai se faigata pe lavelave i le talia pe teena, ae na talia ma le loto maulalo o le tagata faatauva, le loto faafetai i le Atua ua finagalo e fa’aaoga lo la’ua ausage, manu o maua lo la’ua malosi e auaua ai mo le Atua. Ua la faatuatua, e faatalitali, faalagolago ma faamoemoe tasi i le mana o le Atua e mafaia ai le galuega. Talu ona la’ua i’u mai Malua i le tausaga 2013, (2014 mo le faailoga BD), ma galue ai i le Ofisa Tutotonu o le Ekalesia i le Matagaluega A’oa’oga Kerisiano ia Aperila 2015, sa fai lava ma faatalitali i le aso e oo mai ai le valaau e galue faafaifeau tausii nuu. O leni ua tali le Atua i talosaga, ia faamanuina Lona suafa. Sa ia faafetaia foi o la’ua aiga, ae maise o matua faaleagaga, mo le tapuaiga; ae maise le paia tele o le Ekalesia i Papa, ona ua mafai afe ona ane la latou faatofalaiga ia te i la’ua auaua faatauva. Ua folafola foi o le a faia le mea e gata ai le malosi ma le iloa, e faalagolago i le fesoasoani mai a le Alii, ina ia manuia le galuega a le Atua, faaolaina agaga o Lana fanau, ma saga viia ai Lona suafa e faavavau.

O le Taitai o le sauniga, le KMTA Faasaleleaga ia Leaso Tupa’i FT, ma le susuga Ioane Viliamu Samoa FT, faapea le susuga Palemia Tauiliili Reupena FT, ma le Faifeau Nasareta i Puleia, sa valaauina e faatalofa, faafeiloa’i ma faamaonia le tofia aloaia o le faifeau ma le faletua, e avea ma faifeau o leni Aulotu a le Ekalesia Faapotopotoga Kerisiano Samoa. O Lauga mo le Faifeau faapea foi mo le Aulotu, sa faamamafa le soifua faatuatua ma le ola auaua faamaoni i le Atua, faapea foi le agaga fe’oe’oea’i e faigofie ai ona uli le sa o le Ekalesia, ma ia lelei fesoota’i o le tasi ma le isi, ae sili fesootaiga vavalalata ma le Atua. Pe afai foi e fetia’i ma aso louloua o le galuega, ia mulumuluaufoe ma oloolopitova’a le tofa ma le utaga, e vave ai ona toe fonoa ni masaesae o le upega. Na folasia foi le o Feagaiga na saunia e le Aulotu faapea aiganalua, o pine faamau i le tu ma aga e faamemelo i ai le atunuu pele. Na mae’a le sauniga ona alo ane lea o le Ekalesia i Papa, mo le taumafataga tele ae maise o fa’aalologa maualuluga, mo le Taitai o le Sauniga, o susuga Toeaina ma Faifeau ma Faletua, o Aiganalua ma le mamalu sa auai e molimauina le faamoemoe. O le susuga Enoka o se lupe faalele a Aiga, le afioga ma le EFKS Poutasi, a o le faletua ia Susi o se taulaga soifua a Aiga, le afioga ma le EFKS Gautavai. Ia faamanuia le Atua, ma ia ia te Ia le viiga e faavavau.

EFKS AVAO - PAPA O MISI - SAVAII

FAAFETAII!!FAAFETAII TELE LE ALOFA MA LE AGALELEI!!

Ia faasilisiliina pea ona tu maualuga le Viiga o le Atua Silisiliese i mea lelei uma ona o lona alofa ma lona faamaoni ia i tatou. O la le Faisalamo – “*Le Alii e, o i le lagi lou alofa, ua oo i ao o le lagi lou faamaoni.*”...*Le Atua e, e maeu lava lou alofa, o le mea lea ua faatuatua ai tagata i le paolo o ou apaau. E malilie i latou i mea lololo ua i lou fale; e te faainumia foi i latou i le vaitafe o au mea faafiafia. Aua ua ia te oe le puna o le ola, o lou malamalama matou te iloa ai le malamalama. Ia e faafualoa lou alofa i e ua iloa oe, ma lau amiotonu i e ua faamaoni o latou loto.* “ (Salamo 36 : 5,7-10)

Ae matou te le’i taiaina ao o maugaloa ma tatala le ta’afi tualua, lea na ifo ai le aso o le āiga sa Sa’umani, matou te le toe taiaina ‘ulufao, pe toe sasaina le fala e pei o le faiva o poula, pe matou te toe ‘a’ufagaina fo’i le niuloa pe toe paopoina fa’atupe ua muli o taulafoga. Auā o pa’ia o Samoa e mai le vavau e o’o i le fa’avavau. O sa ma faiga o Samoa mai Saua se’ia pa’ia Analega, e faapea foi i Paia ma Mamalu maualuga faale-Talalelei, i Ekalesia kerisiano uma ma le Aufaigaluega tofoti a le Atua, e leai lava se e mafai ona toe suia se mea e tasi. Auā o Samoa, o le ao mamala, o le la’au e mafalā ona la. E leai se potopoto po’o se vave na te toe autalaina fa’alaupaogo, pe toe auauina fo’i fa’ai’a iviiviva. Aua o pa’ia ua potopoto a’o se ala o’o.

Ae ua laga se leo vaivai o lenei Aulotu, ona e faigata lou Maamaau Alofa, ma lou Tali Alofa mai, e tusa ma lo matou faatalauula atu, ona ua matou lima vaiavai, ma ua le ma ai lava mata le mativa, ona o le fia faaleleia o le Maota o le Galuega a le Atua, o le ala lea sa matou faatagisia ai lou aao fesoasoani mai, e ala i Tupe Paia, na outou maau i ai. Paga lea, e le mafai e se malosi o sa matou upu faafetai, ona faamalieina lou finagalo alofa ma lou agalelei mai, e le o lilo foi i le silafaga a le Atua, lou aao foai ma lou alofa mai. Ae tau ia ina aveva lenei auala, e matou te matuā momoli atu ai, mai le taele o matou agaga, lo matou loto FAAFETAII! FAAFETAII! FAAFETAII TELE LAVA! O la matou tatalo i le Atua, ia maligi faaua mai le lagi, ma ia faaifo mai lagi manū, e toe faatumu sautualasi atu i ana faamanuiaga o lona sosia ma lona tamaoai, i soo se auala, lou maau alofa ma lou agalelei ua toesea, ona o lou alofa mai. Ae o lou tou maau alofa lenei :

MAAU – AUFALGALUEGA PAIA A LE ATUA.

Faafegaiga Toeaina & Faletua & Aulotu

1.Rev. Elder Palemia Tauiliili & EFKS Samalaeulu	\$1,000
2.Rev. Elder Faauga Matautia & EFKS Tulaele	\$1,000
3.Rev. Elder Siolo Tauati & EFKS Apia Uta	\$600
4.Rev. Elder Misipalauni Faatau & EFKS Ketesemane Fou	\$500
5.Rev. Elder Ceaser Samuelu & EFKS Pata Falelatai	\$500
6.Rev. Elder Ioane Samoa & EFKS Fogapoa	\$400
7. Rev.Elder Fili Matalavea & EFKS Faleula	\$300
8..Rev.Elder Faasavala Leilua & EFKS Faiaai	\$300
9.Rev.Elder Leaso Tupai & EFKS Gautavai	\$200
10.Rev. Elder Amuia Seuala & EFKS Papa Sataua	\$200
11. Rev.Elder Tanielu Apineru & EFKS Safotu	\$200
12. Rev.elder Fiafia Toleafoa & EFKS Siufaga	\$200

AOFAI \$5,400.00

Maau – Aufaigaluega Faafegaiga & Faletua & Aulotu

1.Esera Auatama Esera FS & EFKS Sapapalii	\$3000
2.Okesaita Iosia FS & EFKS Eastern Creek, Australia	\$2,000
3.Peteru Seiuli FS & EFKS Alafua	\$1,260

4.Siaosi Salesulu FS & EFKS Vailele	\$1,005
5.Dr. Paulo Korua FS EFKS Faatoia	\$1000
6.Eric Mulitalo FS, EFKS Fasitootai	\$1,000
7.Seilala Luamanuvae FS Vaivase	\$1,000
8.Esekia Peneueta FS & EFKS Lepea	\$1,000
9.Apelu Lelevaga FS & EFKS Apia	\$1,000
10.Ali Alapati FS & EFKS Lelepa	\$1,000
11.Taulotoga Viliamu FS&Fagamalo	\$1,000
12.Tanielu Tupuse& EFKS Patamea	\$1,000
13.Kirismasi Muaava & EFKS Vaisala	\$1,000
14. Soti T. Roma FS&EFKS L/lava	\$1,000
15.Niulala Kupa FS & EFKS Tafua	\$500
16.Fereti Sefo & EFKS Vaitoomuli	\$500
17.Nouata Saifoloi FS & Vailoa-uta	\$500
18.Siaosi Mataia & EFKS Vailoa-tai	\$500
19.Semikueva Faatoaafē FS & Moataa	\$500
20.Aulotu EFKS Manase	\$500
21.Penaia Koro & EFKS Saleaula	\$500
22.Atapana Tupuola FS & EFKS Satoalepai&Safa'i	\$500
23.Hemi Faatonu FS & Fuailoloo	\$500
24. Poasa Toiaivao FS & anugamanono	\$400
25.Mafi Faamoe FS & EFKS Fusi, Safotulafai	\$400
26. Vavae Maua FS & EFKS Samauga	\$330
27.Reupena Nofoaiga FS & EFKS Elisefou	\$300
28.Seti Seti & EFKS Saleimoa	\$300
29.Avele Utumapu FS & Apolima-uta	\$300
30.Ionatana FS & EFKS Maugafiafia	\$300
31.Tautua Aurelio & EFKS Vaigaga	\$300
32.Penaia Europa & EFKS Aopo	\$300
33. Alesana Afamasaga FS & EFKS Lefagaoalii	\$300
34.Afatia Niue FS & EFKS Fagae'e	\$300
35. Epati Amosa FS & EFKS Sili	\$300
36.Vaivai Tauilili FS & EFKS Salelavalu	\$300
37. Lauititi Vaega FS & EFKS Matavai	\$300
38. Rimoni Wright FS & Faletua (Teutupe EFKS Tamaligi)	\$200

39. Mose Tanielu FS & EFKS Puleia	\$200
40. Simona Perefoti & EFKS Etena fou	\$200
41. Dr.Eletise Suluvale FS & EFKS Toamua	\$200
42.Amosa Reupena FS & EFKS Vaimoso	\$200
43.Ioane Petaia FS & EFKS Vaoala	\$200
44. Faatafa Nefu FS&EFKS Alamagoto	\$200
45. Aperaamo Tufuga FS & Pu'apu'a	\$200
46. Alapati Faataitai FS & Tufutafoe	\$200
47. Leauma Faletoese FS & EFKS Falealupo-uta	\$200
48. Anthony Leaana FS & EFKS Paia	\$200
49. Eroni Sitanilei & EFKS Malie	\$150
50. Peia Lesatele FS & EFKS Avata	\$100
51.Faataualofa Mata'i FS& EFKS Asaga	\$100
52. Sepi Gafa FS & EFKS Solosolo	\$100
AOFAIGA	\$29,145.00

**Maau o Lupe Faalele
& Tamafanau a Avao**

1. Auvaa Peseta FT & EFKS Leufisa	\$1,000
2. Tuia Peseta FS & EFKS Siumu	\$1000
3. Mose Galuvao, Leota Valma, Faletua – Eseta Tofilau	\$1000
4. Timoteo Tapelu & EFKS Faleasiu	\$500
5. Gatai Masau FM & Ekalesia Metotisi Maota	\$400
6. Toleafoa Siliato & Tauai Fiapito & nofoaalo	\$6,100
7. Lealaiauloto Tavita (AF) & Faletua & nofoaalo	\$1000
8.Maiava Afano & Faletua	\$800
9. Nafaitoa Talaimanu Ketu	\$500
10.Mataia Panapa	\$100
AOFAIGA	\$12,400.00

TUUFATAASIGA ATOA **\$46,645.00**

(Fa'auma itulau 11)

FAAPA'IA MALUMALU EFKS TOOMATAGI, APIA

“Le Alii e, lo matou Atua, o le oloa uma nei ua saunia e i matou e fai ai se fale mo oe, ma lou suafa paia, e mai ia te oe ia, o au mea uma foi ia.”

O le susuga Siolo Tauati FT (EFKS Apia-uta), le toeaina Pulega Apia Sasa'e, KMTA Mtg Apia, na taitaiina le sauniga e faapaia ai le Malumalu EFKS Toomatagi, i le toe aso o Aperila 2021. O Dr. Paulo Korias FS (EFKS Faatoia) na faitauina le Tusi Paia (Salamo 114) ma faia le Lauga - IA ILOALEAUAI MAI O LE ATUA. O le faletua ia Susana T. Iosia na ooti le lipine, ona valaau lea o le Taitai o le Sauniga i le afioga Matuaofaiva, Sufia Sefulutolu Maiava (Patamea/Manase) ma tatala mai ai faitoto'a, seia ulufale le faapotopotoga - le Laulau o le Fono Tele, Toeaiina ma Faafeagaiga ma latou Faletua. O le Tala o le Galuega na saunia e le faafeagaiga, susuga Fuaao Fuimaono FS na ia ta'ua: O le Falesa lona tolu lenei talu ona faavae le Ekalesia, i luga o le nofoaga e tasi; muamua 1984 ma lona lua 2007. O le 2018 na amata vaai ai ua ta'ei utupoto; 2019 fai le fuafuaga mo se galuega, saili le kamuta ma le inisinia aumai le fautuaga, ua le saogalemu le malumalu, e le umi foi ona aoga se galuega faafou, ae o le malumalu fou e fautuaina.

Na filifilia loa le afioga Sufia Tolutasi, o le ta'ita'i kamuta o le Evaeva Contractor, o le ata na tusia e Uati Ti'afau (Kolisi Leifiifi) sa galulue faatasi ma Tulua Esera (Inisinia Malae Vaalele), a o le laisene a Konrad Lober (Niu Sila). E 78'x40' le fua o le malumalu + 40'x20' faapaologa + 22'x20' potu i tua - e 10'x2' e tele atu ai nai lo malumalu muamua. O le Aso Sa 18 Oketopa 2020 na faamavae ai, tala i lalo le malumalu tuai, amata le galuega seia faai'uina Aso Farai 16 Aperila 2021 - e 22 vaiaso na fausia ai. Ua tuai teisi le galuega ona o aafiaga i femalagaiga Salafai - Upolu (mo le kamuta), ma Niu Sila - Samoa (mo le Fa'alo). O le faatupega o le galuega, sa le lava le Atina'e ma le Sene, ona saili lea ma maua (i)\$200,000 nogatupe NPF (ii)\$50,000 Toomaga EFKS (iii)\$400,000 Aitalafu oloa mai Blue Bird Lumber.

O vaega o le galuega na ofoina ma alolofa mai ai nisi (i) Alo o le Taitaifono Fono Tele & Faletua - Laulau Faamanatuga ma 5 Nofoa = \$4,600, (ii) Alo Faafeagaiga Fuaao ma Sieni Fuimaono - Pulelaa & Nofoa=\$5,000, (iii) Tina Tiakono Faumuina Soonalote (Amituanai Faimanu Tausisi) - Tusi Paia & Pese + \$10,000, (iv) Lauano Perese AF & Sifuiva

Malaea & Fanau - Maa (tiles)=\$19,300, (v) Lupematasila & Laga'asa & Fanau - Ea Malulu ua tusa lona tau \$23,416, (vi) Alo o Moana & Falefia Polataivao - faitotoa tele i tua \$8,000, (vii) Tuigamala Dr. Stanley Dean & Fanau - Pine EFKS &7,000; (viii) Faaiu Fuimaono & Fanau - Keyboard, amps \$15,660 + Projector, screen, laptop etc \$6,446 aofai e \$22,106; (ix) Lauao & Fanau - 2 Uati \$1,700; (x) Mafutaga Tina - Nofoa o le malumalu \$36,000; (xi) Aoga Aso Sa - Moli Teuteu \$2,200; (xiii) Autalavou - 3 Moli Teuteu laiti \$1,800; (xiv) Aufaipese - Collar mic. Aofaiga o ofo/meaalofa e \$136,122. O nisi auaunaga ofofua mai: (i) Lauano Perese - Faa-uaea eletise le malumalu (ii) Lesa Sonny - Galuega tau palama (iii) Thomas Ah Young & Faletua & fesoasoani a Kitiona Levi & Faasuaga Pa'enoa. O le tau o le galuega:

Mea faufale ma masini.....\$355,000
Vaega na Tuufofo/meaalofa\$136,122
Totogi o le Kamuta.....\$150,000
AOFA'ITAU ATOA GALUEGA.....\$641,122

Na faailoa foi e le Faafeagaiga, o le ma'au na maua mai Taalolo ma si'ialofa fa'aaloalo e \$102,000; o le ma'au i meaalofa na faamauiina e \$47,100. Faatasi ai ma le \$20,000 meaalofa a le Ekalesia + \$3,000 a le Taitaifono na tauaoina i lea sauniga, na maua ai le tupe aofaiga \$172,000. O loo i ai le LULU a le Ekalesia o loo faatauina, ua fuafua e se'iina i le masina o Iuni 2021, ma ua faamoemoe e maua ai le \$400,000, e totogi ai aitalafu o totoe. Na tualuga le Tala o le Galuega i le Faafetai tele i le Ekalesia Aoao, o lona nuu le EFKS Sapo'e, Pulega Apia Sasa'e, ma le toatele o Toeaina ma Faifeau ma Faletua, o la'ua aiga ma uo, ma soo se tasi na agalelei fesoasoani ma lagolago atu i le galuega. Ia alofa le Atua o Le ana le Fale Sa, na te tau ma faamanuia ma toe faatutumu le tamaoiga ua gaogao ona o Lana galuega ma Lona suafa.

O le afioga Taitaifono Fono Tele 2021 susuga Tunumoso Iosia FT (o le Tama Faaleagaga foi o le Faifeau), na saunoa e faafetaia le Faafeagaiga ma le Faletua ma le mamalu o le EFKS Toomatagi, i ona tulaga faalupe (e toatele i Tina) ona o le soifua faatuatua, soifua tautua ma alolofa i le Alii o Iesu Keriso ma lana Ekalesia, e ala i lenei galuega tele ma matagofie. Na tualuga le sauniga i le Talisuga Paia a le Alii na taitaiina e le susuga faafeagaiga. Ona alo ai lea i le tausamaaga, ma fa'aaloaloga maualuluga a le EFKS Toomatagi. Malo! Ia i le Atua le viiga.

O TATOU MEA 'AI E TATAU MA LE ASO

Aso Sa 25 Aperila 2021

O le atamai ofoofogia o Iesu

Tusi Faitau: Mareko 6:1 – 13, *“²Ua oo i le sapati, ona aoao atu lea o ia i le sunako, e toatele o e na faalogo ai, ua ofo i latou, ua faapea atu, “Maifea na maua ai e lenei tagata ia mea? Se a foi lenei poto ua tuuina atu ia te ia, ina ua faia e ona lima vavega e faapena ona tele?”*

O le Tala Lelei a Mareko o se molimau i le faanatinati o le tagata ma le feau o Iesu: o tala i fetaiaga faanatinati, o se auala vave ia oo ai i le taualugaina i le satauro, ma le faolataga o loo ia ofoina mai. O le Iesu a Mataio o le Faia’oga; o le Iesu a Luka o le Foma’i. Ae o le Iesu a Mareko o loo ia faasino le auala ma le faatauanau a le perofeta: *“¹⁵Ua oo mai ona po, ua latalata mai le malo o le Atua; ina salamō ia, ma faatuatua i le tala lelei.”* Mare.1. O loo ia faatonuina lana au faalogologo i le auala o le atamai faa-faiaoga o loo aofa’i ai ma le tuanai ma galueaina le lumana: *“²⁹Faalogo mai ia Isaraelu e; o le Alii lo tatou Atua, o le Alii e toatasi ia. ³⁰Ia e alofa foi i le Alii lou Atua ma lou loto atoa, ma lou agaga atoa, ma lou manatu atoa, ma lou malosi atoa. ³¹O lona lua lenei, Ia e alofa atu i lē lua te tuaoi ia pei o oe lava ia te oe.”* E leai lava se tasi poloaiga e sili i na poloaiga.” Mare.12. O loo i ai le aano faigofie i lenei aoaoga ofoofogia: o se taula’iga faaosofia, o se faatosina i avanoa e gafatia ai mea tetele. O loo valaauina i tatou ina ia tepa taula’i ma faamamafa le vaai i nei matālālāga faigofie i lenei vaiaso, ma mulimuli ai.

†Ia e tatala mata o lo’u loto, ‘aua le taofia le agaga o o’u taliga ina ia ou faalogo ma lagona upu o le ola e te fetalai mai ai, ma ou mauaina. Amene.

Aso Gafua, 26 Aperila 2021

Taomia e Tulafono a le Atua faiga masani

Tusi Faitau: Mareko 7:1 – 13, *“⁶Ona tali atu lea o ia ia te i latou, ua faapea atu, “Ua tatau lelei le valoaga a Isaia ia te outou tagata faafiaamionu, e pei ona tusia, ‘Ua vivii mai lenei nuu i o latou laugutu, a o latou loto ua taumamao ia te au. ⁷E tapuai fua mai i latou ia te au i lo latou fai ma mataupu o poloaiga a tagata.”*

O le agaga o le tagata ua masani ai i le faaititia o misiterio i le avea ma mea ua mautinoa, o le avea o mea moni silisili ese e peisea’i o ni mea faatauvaa ua masani ai. O faatofalaiga lelei e muamua ona avea ma ni ta’iala, ae i’u ina fai ma mea masani. Tatou te tosina ma pa’u’u atu i le faavasegaina o le tele o mea moni ma avea i latou o ni mea e mafai ona valoia. Ua tatou masani ai ma lo tatou natura o le pule i se mea, nai lo le pulea mai o i tatou. Peiseai ua tatou lē mafai ona soona sogasogā e sailiili i le ofoofogia o loo i totonu o le tele o mea. Ua tosina atu i tatou e le malosi o le talitonu i na o mea ua fai soo, ma avea ai mea ua masani ai o le ta’iala mo le saogalemū. O le pele i loto o tu ma aga masani o le fili lena o le vaaiga mamao ia faasa’oloto na te aumaia se lumana’i maumaututū. E lē o toe mamao ae falepuipui i tatou i faiga tutumau e faasaoina ananafi ma le tuanai, ae musu e tagataga’i i se taeao fou, ma se lumana’i e manino ma saoloto. Ua tatou faamallosia lenei vaaiga faalelalolagi ua saosaoa ma mausalī, ua uliuli ma pa’epa’e, e lē gata ia i tatou ae ua tatou faamallosia foi mai isi tagata o tatou ola faatasi. O lo tatou valaauina ia mafai ona tatou sopoa tua atu o le malosi o tu ma aga masani o ananafi, ma mulimuli atu ia Keriso i le lumana’i malamalama o le Tala Lelei o le faaolataga. O lo tatou valaauina lenei: ina ia faafeliua’i le lalolagi i luga ma lalo, ia avea le pogisa ma malamalama, suia le faanoanoa i le olioli, ma faiga pi’opi’o ia suia i le amionu, saolotoga ma le filemu. E manaomia e lo tatou valaauina le lototele a le molimau toa. E pei ona tusia e le tamaitai tusitala o Kate Chopin i lana tusi *The Awakening* (1899), ‘O le manulele o le a lele a’e i luga atu o le fanua laugatasi o tu ma aga masani faapea le faaitū’au, e tatau ona ia te ia apaau malolosī. O se vaaiga faanoanoa le iloa atu o nai manulele laiti ua manu’anu’a ma vaivai, o latou apaapatā toe foi mai i lalo i le laueleele’.

†Ia faia a’u ia faalētonu, faasaoloto a’u mai le gaogaosā o loo saisaia a’u i auala tuai e le’i iloga ona iloiloaina, ma faasaoloto au ina ia ou saili ma le lē fefe i ala fou o le alofa, olioli ma le filemu e aumai e le Tala Lelei ia Iesu Keriso. Amene.

Mo Mafaufauga Atili: Iloilo pe faapefea ona e vaaia le amio a i latou aupito latalata ane ia te oe, e tusa ai o tu ma aga masani o tapuaiga, o le faatulagaina

Aso Lua, 27 Aperila 2021
O le tiapolo o se filifiliga mai lou loto

Tusi Faitau: Mareko 7:14 – 23, “²¹Auā e alu ae mai le loto o le tagata o le manatu leaga, o le faitaaga, o le gaoi, o le fasioti tagata, o le mulilua, ²²o le manumanu, o le amio leaga, o le pepelo, o le mātaitu, o le mataua, o upu faaleaga, o le faamaualuga, o le lē mafaufau. ²³O ia mea leaga uma e sau mai totonu, ma leaga ai le tagata.”

O le atamai o Iesu le alofa - alofa i le Atua, alofa i le tuaoi ma le alofa i le tagata lava ia. O lenei valaau ia alofa na te manaomia le matuā faasaga ifo i le iloina o oe lava. E faato’ā mafai ona tatou alolofa ia i tatou, ina ua tatou iloa i tatou lava. A aunoa i tatou ma le alofa faamaoni ia i tatou, tatou te lē mafai ona alolofa i le Atua poo tatou tuaoi. Pe afai tatou te mumusu e faamaonia o ai ae o le ā i tatou, o le a tatou ola tete’e, ulufale atu i le faigamalo o mea pepelo ma le taufaa’ole’ole, e faigofie atu ona faitio ma ta’usalaina isi tagata, e folafola mea e tutupu o ni faalavelave e tapu. Pe a matuiā lo tatou faitioina o isi tagata ma faaeteete i tatou foi, ona tatou faasā lea o gaoiiga ma faatinoga, ma manaomia ai isi tagata ma i tatou ina ia ‘alofia nei mea. E faigofie atu ona faatonutonu a tatou gaoiiga ma mea e fai ae faamasino gaoiiga a isi tagata, nai lo le vaavaai toto’a ifo i o tatou lava loto. O iina le nofoaga e nofofale ai tatou filifiliga o le leaga, tusa lava poo le a lo tatou taumafai malosi e alofia faiga ma gaoiiga leaga. E mafai ona tatou faataunuaina faatinoga ma gaoiiga o se olaga lelei mai i fafo, a o tatou faafaileleina ma teufatu faufauga leaga i o tatou loto. I le i ai o le faailoga tagata ma le faaituau, o tu’inauga leaga ma le matape’ape’a, o le ita faamoemoe ma le fia tau ma sui, o le loto vale ma le itaitagofie ua maua’a ma mautū i totonu o i tatou, tatou te mafai ona faailoa atu ma le fuafuaina lelei, se olaga e maoa’e le paia i isi tagata. O le faailoga lanu ma le faitio, o le faasala ma le faamalaia e faigofie ona oo mai ia i tatou, peitai o upu ma gagana e taugofie ma le faafoliga e faigofie. O i latou e mulimuli ia Keriso e ao ona suesue lelei ifo o latou loto, auā o iinā e nofo ai le agasala.

†Ia e su’esu’e mai ia te a’u ma e silafia a’u, i lou alofa mutimutivale faailoa mai ia te a’u lo’u tagata pe se ā; ona toe faafoisia lea o a’u e lou alofa, faamalosia a’u e lou alofa tunoa ina ia avea a’u o le tagata e tusa ona e foafoaina ai.

Mo Mafaufauga Atili: Su’esu’e ifo i matālālāga o lou alofa, o filifiliga e te fai, ma faitau poo fea le mamao e oo i ai lou alofa i le Atua, o lou tuaoi, ma lou lava tagata.

Aso Lulu, 28 Aperila 2021

Ia iloa tino mea faaletagata ma mea paia.

Tusi Faitau: Mareko 8:27-33, “³³A o ia ua fāliu, ma silasila ane i ona soo, ona vavao atu lea o ia ia Peteru, ua faapea atu, “Ina alu ia i o’u tua Satani e! Auā e te lē loto i mea a le Atua, a o mea a tagata.”

O Iesu na matua’i lē malamalama ai lava tagata na latou ola faatasi, ae maise ona lava soo. Na Ia afio mai i le tala faasolopito o le lalolagi i se taimi ma se nofoaga sa sili ona faamanu’alia, ua masaesae ma tumu i le faalētonu: o Palesitina o loo pulea e le malo Roma. O le vevesi faatupu faalavelave ma le ita o loo lagonaina e tagata. Sa latou faamoemoe i le faaolataga na folafola mai e aūga perofeta. I le amataga na latou manatu o Iesu le Mesia folafolaina, peitai na avea o Ia ma faatupu lē fiafia ia i latou; i le i’uga na latou lafoa’i ia te ia. Na vaaia e tagata ia Iesu o le a maua ai se fofō faavave i faafitauli faapolokiki e uma ai pulega leaga, o faiga sauā ma amiolētonu. Sa latou tulimata’i mea faalelalolagi, faiga faaletagata. Tatou te pa’u’ū foi tatou i le mailei lava lea e tasi.

Tatou te mana’o ia fai Iesu o se faimeamāneta, na te faafiafia tatou i lona aveese mea tatou te fefefe ai. Tatou te mamana’o ia avea Iesu o se papetia ina ia faatogafiti ma pulea tagata ma mea e tutupu e tusa o lo tatou mana’o. Tatou te manana’o ia avea Iesu o se tamā o le Kerisimasi na te aumai faa-mealofa mea uma tatou te faamoemoe i ai. E pei o i latou i taimi o Iesu, e faapea foi ona tatou lē manana’o ia Iesu na te aumai se auala fou o le avea ma tagata, se auala fou e faafetaiai ai le lalolagi, o taimi, tau ma auga tupulaga, o le ola ma le oti. E lē mo i tatou lea ata telē ma le paia. Tatou te mana’omia se fofō i le taimi nei, se faaolataga i le nofoaga nei, i le ogatotonu o puapuagā o le lalolagi o tutupu nei. E tuufaafegai ma lena, o amioga autū e ao ona tatou tausi i ai, o le tatala lautele ma le mautinoa mafanafana o le moni o le Atua na te sailia se auala ia i tatou. O lenei le faatuatuaga, i le Atua o loo ia galueaina le faamoemoe o le Atua, o le a ia lavea’iina i tatou.

O le Ala o le Satauro

Tusi Faitau: Mareko 8:34-38, “³⁴*Ai se fia mulimuli mai ia te a’u, ia faafiti o ia ia te ia, ma ave e ia lona satauro, i le mulimuli mai ai ia te a’u.* ³⁵*Auā ai se fia faasaogalemuina lona ola, e māumau ai ia te ia; a o lē faamāumau lona ola ona o a’u ma le Tala Lelei, e faasaoina e ia.*”

O Iesu, le Alo puapuagatia o le Atua, ua Ia toe tatalaina le taimi, ma toe fausia le tala faasolopito. I lenei toe foafoaina o mea uma, o le ofoina faaositaulaga o lona alofa foa’iina atoatoa, ua avea ma nofoaga laualuga o le lalolagi, ua tatalaina ai e faavavau se auala ua faafou mo le fanau a tagata. O le taimi ma le tala faasolopito ua toe tusia faa-faavae e le alofa, i le alofa, ma le alofa, mo le alofa. O lona tau e lē itiiti ifo i lo mea uma. Ona o lea, ua tatou maua ai e sili atu i mea uma. E ala i le ofoina alofa o Ia e Ia lava, ua gaosia ai mea uma, ua aumaia mea mea, ua faamagaloina mea uma, ua faafouina mea uma, ua toe faatauina mea uma, faamamāina uma. O le ala o le satauro, se faataugāina, matuitui ma se faasalaina sauā o le mamā atoatoa, e lē o le i’uga ae o le amataga fou.

O le amoina o lona satauro – mai le ulua’i te’ena e oo i le valaau mulimuli o le tuulafoa’iina – e moni lava o le alofa ua na faatoilaloina mea uma. O lana toe tau’alaga mai le satauro a o tō lana mānava mulimuli (Mareko 15:37), o le iliga lea o le pū e valaau ma faasilasila ai le amataga fou o le lalolagi. O mea moni e tino mai ua toe faafouina, toe togiolaina, toe faafouina i le alofa e manumalo ma onosai. Ua lē toe avea le mitamita, tuinanau, ita, loto leaga ma le fuā, o si’omaga o laasaga o le tagata. Ua faamagaloina agasala, lafotuina ma fulifaō amio leaga, o le leaga ua faaleagaina, ma le oti ua faatoilaloina. O le satauro lenei ua valaauina i tatou e amo, e leai se itiiti ifo nai lo le alofa. E lē mo i tatou le sauāina, puapuagā ma le oti. Mo i tatou, o le alofa le valaau, o le ala ma le ola.

†Ia e ave ia te a’u faatasi ma oe Iesu e, e pei o le alofa na e taliaina ai le teena, pei o le alofa na e aveina ai lou satauro, pei o le alofa na e puapuagatia ai ma maliu tiga – ina ia faagaetia a’u i le alofa, ma ou alofa ai foi. Amene.

O LE LAUGA (*mai le itulau 3*)

Ioe, o lalo lava e maua ai mālō, e le finagalo le Atua e ati se pā i lō tatou vā faale-tagata, ae o lo o finagalo le Ali’i ia tatou fealofani, ma tatou iloa ona faia lona finagalo - le finagalo na lailoa ai lona Alo e to’atasi i luga o le satauro, ona o lō tatou ola faamaualuluga ma loto ua leaga – ua māfua ai ona tatou agasala. Le loto maulalo lea o Iesū, na ia talia ai tīgā o le sauāina ma le oti, tautau i le satauro ma tanumia i le tūugamau, ona o lona naunau e aumai se ata o le loto maulalo, e maua ai mālō. A lea ua faaeaina ai o Ia i le mālō o lona Tamā, ae aumai manuia mo tā’ua pe a tatou talia lana fa’aolataga lea ma le loto salamō ma le faatuatua faamaoni.

O lalo lava e maua ai mālō. Amene.

Saunia: Faraimo Ti’iti’i FS, EFKS Utualii, Matagaluega MALUA.

FAAFETAIA EFKS AVAO

(*mai le itulau 8*)

O le aofaiga atoa lena (\$46,645) o lo outou maau ma lo outou agalelei, seanoa lo outou alofa ma le fesoasoani mai, semanū e lē atoa tino o le tama, i le Maota o le Galuega ua i ai nei. Matou te toe saga momoli atu ai le agaga faafetai tele i Susuga i Faafeagaiga Toeaiina & Faletua ma Aulotu, o Susuga i Faafeagaiga & Faletua ma Aulotu, e faapea foi Lupe Faalele ma Tama fanau a lenei nuu ma lenei Aulotu, faapea nai a matou uō ma e masani. Matou te matuā faamālulū atu foi ma faatoese atu, ma asuasua atu vaimālū i o outou finagalo, pe afai ua lē tau tamalii le ala sa matou uia, ma solivale ai outou eleele sa, ma o outou Maota sa, ona ua le mā mata o le mativa, faamagaloina mai lenei Faifeau mativa, ma lenei Aulotu lē tagolima.

Ae matou te toe faapea atu, **FAAFETAIA! FAAFETAIA! FAAFETAIA TELE LAVA! Ia faamanuia le Atua ma Taui atu i soo se auala lou Alofa ma lou Agalelei mai, ma lau Tali Alofa mai**, e tusa o lo matou tagi atu, auā le atina’e o lenei foi itutino o le ta Ekalesia pele. O le upu e fai i le itulagi lea; “*A e iloa a’u i Si’ulepa, ou te iloa foi oe i Togamau.*” A o la le Aposetolo o Paulo, “*Afai ou te tautala i gagana a tagata atoa ma agelu...a e leai so’u alofa, e leai lava sona aogā ia te a’u.*” **Faafetai, Faafetai tele lava :**

Rev. Tavita Kirisimasi Sala’a Fiti & Aulotu EFKS Avao, Gaga’emauga, Itu o Tane, Savaii.

O E UA FAI I LAGI FOLAUGA

TOGOI’U LEASITUPA’I

MOSE FAAPUEA

16/3/1976 - 24/4/2021 (45+1+9)

O le Tiakono i le EFKS Sasina, Matagaluega Itu o Tane, sa galue i le Malo i le Matagaluega a le Palemia ma le Kapeneta (MPMC) i le Ofisa o Femalagaiga. Olona tama o Togoi’u Faapuea o Sasina, a o lona tina o Miriama mai Sasina lava. E ui ina o ia le ui’i o le fanau e 13 (8 uso + 5 tuafafine), ae ua faae’e i ai suafa ma le tofi e aveva ma Sa’o o le Aiga. Na faaipoipo atu ia Matamua Philomena Faitoaga Ti’a o Salelologa i le aso 8 Aperila 2006, ma nonofo ai i Fa’ala Palauli; e to’a 6 le la’ua fanau (o le ulumatua e 14 tausaga, o pepe na maliu ia Ianuari 2021). E maua i le gasegase o le toto maualuga, ma o le molimau e faapea na oso lona ma’i i le po o le Aso Faraile i lo latou aiga i Aleisa, ma nanati atu ai i le Maota Gasegase Motootua, ma maliu ai lava e le’i toe malamalama, i le vaveao o le Aso Toona’i 24 Aperila 2021.

O le faasologa o ona toe sauniga na amata mai i le sauniga faaleaiga, sa faia i le Maota Maliu o Sefo Pa’u Tafaigata, i le Aso Sa 2 Me 2021. O a’u (Faitoaga Tolua FS) na ta’ita’i, fai le Tatalo ma le Lauga. Na molimau sui o le Ofisa Femalagaiga ma le toatele o sui o le aiga, ae maise le afioga Laaulialemalietoa Leuatea Polataivao le sui o le afioga, itumalo ma Ekalesia i Sasina. O Pese ma Viiga o le Atua na ta’ita’iina e le Mafutaga a alo ma fanau a le EFKS Sasina i Apia/Upolu - le Mafutaga sa Taitaifono ai le afioga Togoi’u Mose Faapuea. Sa auai le Ofisa Sili o le Matagaluega Palemia ma le Kapeneta, afioga Agafili Shem Leo, peitai sa faaleoleo lana molimau mo le toe sauniga pe a aulia. Na toe moe ai le tino maliu o le tiakono i le Fale Maliu, a o le taeao o le Aso Tofi, 6 Me 2021 na ou faia ai le tatalo ma molimoli atu ai lona sa i le Malae Vaalelei Faleolo mo le auina atu i Savaii i le itula 10.00am. Na taunuu atu i Maota o faatali mai ai lana Feagaiga taulagi, le susuga Panapa Too FS ma le EFKS Sasina ma lona aiga, ma latou momoli atu ai lona sa i lona aiga i Sasina. Na momoli sa’o i le Malumalu fai ai le sauniga na ta’ita’i e le susuga Panapa Too FS, o Uilipefosi Te’o (EFKS Faala) na faitauina le Tusi Paia, o le Tausi Matagaluega Metotisi Sasina, susuga Poasa na faia le Lauga, a o le susuga

Faiaoga Malua ia Clarke Stowers na faia Tatalo. E tele foi isi molimau na faia e sui o le Aiga, Nuu, Ekalesia, ma le Matagaluega a le Malo. Ona malolo atu ai lea i lona aiga i Vaiiili, mo leoleoga o le po. O le taeao o le Aso Faraile na fai ai le Toe Sauniga i le Malumalu EFKS Sasina. Na taitai le susuga Panapa Too FS, fai lana Molimau i le soifuaga faaleagaga o le Tiakono, ma auala mai ai le Upu faamafanafana. O le susuga Uilipefosi Te’o FS na ia faaulufaleina le sa o le tiakono, o le Tusi Paia na fofogaina e le susuga Clarke Stowers FS a o Tatalo na saunia e le A’oa’o Malua ia Mika Su’esu’e. O le afioga Agafili Shem Leo na molimau e fai ma sui o le Malo Samoa e faaleo le faafetai faamalo a le Afioga Palemia ma le Kapeneta, mo le auunaga ma le sao taua o lenei tamalii mo le manuia o le atunuu ma le faigamalo. O molimau uma e tagatasi i le soifuaga o se tagata e agamalu ma agafiafia. O se tamā e alofa ma faamaoni i le toalua ma le fanau, e faamoemoeina ma faalagolago i ai lona aiga atoa i faalavelave ma galuega fai. I lana tautua i le malo, na ta’ua ai e Agafili o Tupa’i Mose o se auunaga faamaoni tele i le faatinoina o ona tiute. O se tamalii/failauga o le atunuu e vave ona alualu i luma lona tulaga ona o lona faamaoni ma le tautua faamalosi (e ese le galue i le ofisa, ae toe faaopopo taimi i malae vaalele). Na ia faatuina le matati’a i le aveva ma taitaifono o le Vaega Puipuia Tagata Fegasoloa’i i le Va o Atunuu, (Transnational Crime Board) o se tulaga e na o Alii Malu o le Malo e masani ona latou umia. E tutusa ia te ia tagata uma ae leai se faailoga tagata, na ta’ua foi e Laauli soo sana malaga e foi mai i Samoa, e alu lava i le faasologa aunoa se faiga faapitoa e faia e Togoi’u mo ia poo nisi foi tagata. Na molimau le susuga Faafeagaiga ia Panapa i le Tiakono sa faamoemoe tele i ai i le galuega. O le malumalu fou ua na tatala i lona toe sauniga, o loo pae i le maa na ofoina e lo latou aiga Sa Togoi’u, a o faamalama uma na saunia e le Mafutaga Alo ma Fanua i Apia, sa Taitaifono ai o ia. O malaga a alo ma fanau i atunuu i fafo mo sailiga tupe o le galuega, faapea sailiga manuia mo aiga, o Tupa’i Mose sa mafai ona faigofie ai. Talofa e, ua maliliu toa, ua maumau ai auupega o le taua. Na mae’a lona sauniga ona toe faae’e lea o lona sa mo Tumua, ma momoli atu i Aleisa o loo lagomau ai i lona aiga. *Na foaiina mai e le Alii, ua aveeseina e le Alii, ia faamanuina lona suafa e faavavau.*

Saunia Faitoaga Tolua FS

IA AGALELEI ATU

“¹²O upu a le tagata poto o upu alofa ia; a o le gutu o le vale e malaia ai o ia.” Failauga 10.

O le tusitala fai fagogo lauiloa o Eleni e igoa ia Isopo na ia fai mai, ‘E leai se faatinoga o le agalelei e māumāu, tusa po o le lona itiiti.’ Ao le alii o Iakopo Meriti na fai mai, ‘E i ai le tau e totogi pe a agaleaga, ae i ai le tau e maua pe a agalelei’. (‘It costs to be unkind, but it pays to be kind.’ Tasi o le mea, o le agalelei e lē o lona uiga o le onosa’ia o mea sesē ma le pi’opi’o, poo le musu e faafetaia’i se faafitauli, ina ia ta’uleleia ai oe i le vaai faapolokiki. O nisi taimi e matuā tatau ma talafeagai ona tatou faafetaia’i. Ae ao ona fai i se auala alofa ma agalelei. O sina gaiuiga e amio mālū, e mamao ma loloto le mea e oo i ai, nai lo se upu faatiga poo se i’uleo matagā. E mafai ona faailoa atu le mea o loo e fia ta’ua, i le agaga lelei, poo le agaga faamālie foi.

O se tasi alii sa tu i le laina e fia faatau se pasese i le vaalele. Ina ua oo i le laulau, ona ia fai atu lea, ‘E fia totogi lo’u pasese mo Niu Ioka.’

Sa tali le ofisa, ‘Ua lelei, e leai se afaina. E fia au ‘ato e fia ave?’

‘E tolu’, o le tali atu lea a le tamalaoa.

‘E i ai se ‘ato e te fia taofia, pe e te finagalo e lafo uma ma siaki i Niu Ioka?’

‘Ou te mana’o e siaki le tasi i Sani Faranisisiko, o le tasi i Sini, ma le tasi i Lonetona.’

Ua te’i le ofisa ma pei e ‘ata pe ita, ‘Finagalo malie lau susuga, e lē mafai ona matou faia faapena.’

Sa ‘ata’ata le tamalaoa ma fai atu, ‘Ou te lē iloa pe aiseā e lē mafai ai, auā o le mea lena na outou faia i la’u uta i le vaiaso na te’a nei.’

E sili atu ona taugā le pa’i atu o lau feau tau molimoli i le naifi faapata falaoa, nai lo le agaese fasi manu papalagi. E pei o le auala na fai e le tamalaoa fia malaga ma ana ‘ato; ua le ita ma ‘ote i le mea sese na fai e le ofisa o vaalele talu ai, ae ua momoli atu i se auala malie ma le agalelei, ia ‘aua ne’i manu’a le lotu o le isi tagata. Manatua: *O upu a le tagata poto o upu alofa ia; a o le gutu o le vale e malaia ai o ia.*”

Afai e moni lou fia soifua e tusa ma a’oa’oga mai Afioga e tulei mai Fofoga o le Atua, ona e taumafai lea ma tausisi e ola i le alofa ma le agalelei. O lenei vaitaimi i le fenumia’i o upu fai o malo o Samoa, ua fela’ua’i upu ma tala o tautu’ua’iga faamasinosino, ia tautuana lau gagana alofa ma le agalelei.

FAOASAU IOSEFA MOKE

22 /06/1945 - 21/04/2021 (75+10)

“O i latou ia o e o mai nai le puapuaga tele, ua ta foi o latou ofu, ma ua fa’asinasina-ina o latou ofu i le toto o le Tamai Mamoe” (Fa’a. 7:13-14)

O Faoasau Moke o se tasi o TIAKONO MATUA a le pulega a Vaimauga i sisisfo-ae o le matagaluega a APIA Sasae. E 75 tausaga lona soifua ae faamanavaina lea e lona Matai ma aamia o ia. Sa ia galue I le Komiti a MEATOTINO A LE EKALEZIA i tausaga e tele. O ona toe sauniga sa faia lava i Vailele, o le afioaga ma le ekalesia ua loa ona tautua ma galulue ai, i le aso 23/04/2021. E toatele sa molimau i le tamā, ma na latou taua o se tagata faamoemoeina ma faatuatuaina i lona tulai mai. O lea ua molimau foi sui o aiga, aemaise o fanau. Sa auga ma faataua e Faoasau le soifua tautua ma ola auaua mo IESU ma lona EKALEZIA, o le tamā e alofa, e onosai ma lotomaulalo, e savali i upu na te a’oa’o. E matagofie galuega na te fai. E tausaaafia, e onosai e alofa i lana fanau, ona uso ma tuafafine, ma a latou fanau, e agai iai ma faamaopopo. E lotu fesoasoani i so’o se tagata. Sa fai e Faoasau le faataitaiga, e LE faalogologotiga pe solomuli pe a tele le auauaga mana’omia. Na te le faatigā i se finagalo o se isi tagata, ae taulamua i le faatupu o le filemu ma le nofolelei. O Faoasau e tausii faifeau. E fai taulaga ma taulamua i faata’ita’iga lelei. O se tiakono foi sa faamoemoeina foi i le ekalesia i le tele o ana galuega sa fai. Amuia lava le auauana auā e valaau mai le matai ae oloo faapea ona fai. Sa auau lava foi manatu o lona toe sauniga i upu a le poto e faapea “o le tauleleia e sili i le suauu manogi ma le aso e oti ai e sili i le aso e fanau mai ai. Amuia oe Lefau ua e oti i le oti a le Kerisiano faamaoni ma ua e foi i lou Matai. Ia manuia lau malaga. Alofaaga mai ia te au nei faapea la tatou Aulotu i lau susuga i le Alii tiakono.

O le itula e 11.00 i le taeao, 23 Aperila 2021 sa fai ai ona toe sauniga i Vailele. Sa ou ta’ita’iina le sauniga ma sa ou molimau i le soifua galue a Faoasau. Sa saunia e Paulo Sepuloni (AM) ia talosaga ae o Lealiie’e Asamu Ah-Sam(AF) sa faitau le Tusi Paia. O ona toe sauniga sa faataunuuna lava lea i lona oliolisaga tumau i lona fanua i Vailele, ma sa ou ta’ita’iina foi lea vaega. Ona matou faamavae atu lea ia te ia i le pese masani Pese 268, ‘Talofa, uso e tofaina oe.’ Tofa Faoasau Moke. Tofa loa. Ia manuia lau malaga.

Saunia: Siasia Salesulu (FS)

EFKS Vailele. APIA SASA’E

O E UA FAI I LAGI FOLAUGA

LĒFIU SĀLŪ FINAU

(23/10/1927 - 14/4/2021) 100+5+23

O Lefiu Sālū Finau o le Tiakono Tamaitai o le EFKS Vailoa Palauli, o le toe ulutaia o le afioaga ma le Ekalesia. O le tausaga 2002 na maliu ai lē sa tausialii ai le tina ia Lefiu, le afioaga i le Fofoga o Sa Lilomaiava o Sālū Finau, ona ia fa'aauau lea o lo la'ua tofi Tiakono. O loo faamauina ma faamanatuina e lona aiga, sa fanau mai o ia i le Aso Sa, 23/10/1927, peitai ina ua fia fai lona ta'otoga i le Falema'i i Motootua, na maua ai i faamaumauga a le Malo lona aso fanau, o le Aso Toonai, 23/10/1920; lona uiga ua 100 tausaga lona matua, na mafua ai ona lē faataunuina lona ta'otoga. Na toe foi i Savaii i le Aso Lua, ae maliu ai i le Aso Lulu, 14/4/2021 i lona aiga i Vailoa. O ona tua'a o Fiu Namuasua o Salelologa, ma Lafitaga o Vailoa Palauli. E to'a 4 ona uso, to'a 4 foi tuagane, ua maliliu le toatele. E to'a 11 lana fanau, ua maliliu le to'a 2, totoe ai nei e 5 teine matutua ma le to'a 4 tama. E to'a 42 i latou na tututpu mai ia te ia, e aofia ai ma le to'atasi o le fanau a fanau a fanau a lana fanau.

O ona toe sauniga na faia i le Aso Faraile 23 Aperila 2021. O le itula 7.00 i le taeao na aveeseina ai lona tino maliu mai le fagaena i Tuasivi, ina ua mae'a le Sauniga/Tatalo sa faia e le susuga Letaulau Mataafā AM (o loo ia tausia le galuega EFKS Vailoa, Palauli). Na taunuu atu lona sa, o loo faatali mai e le mamalu o le Pulega Palauli, ona fai lea o lona Toe Sauniga i le Malumalu EFKS Vailoa, Palauli sa faatautaia e le Pulega. Na ta'ita'i le Toeaina KMTA Faasaleleaga, susuga Leaso Tupa'i FT, o Falevī Petana FS (EFKS Maota) na faaulufaleina le sa o le Tamaitai Tiakono, o Epati Amosa FS (EFKS Sili) na saunia Tatalo, o Uilipefosi Te'o FS (EFKS Fa'ala) na saunia le Lauga. Na molimau le sui o le fanau ia Tulipe Siō, i se Tina au malos i lana tautua ma le tausiga i le Tamā ia Sālū ma i latou le fanau ma le aiga, tainane le nuu ae maise i le galuega a le Atua. I aso o le lima vaivai e leai se taavale, e le'i solomuli pe faafiti ai lana auaunaga faatina, faa Tiakono, i lona to'aga i le Lotu, o Potopotoga, Tofiga ma mea e fai a le Aulotu, Pulega ma le Matagaluega. O se Tina e alofa faamaoni i lana fanau ma lona aiga ma lana Ekalesia; loto maualalo, filemu ma agafiafia. Sa mafai foi ona auai mai i le sauniga, ona aiga ma lana fanau

mai Niu Sila i luga o fesootaiga faatekonolosi, ma latou lagiina ai nisi Pese ma Viiga e ala mai ai o latou alofaaga ma faamavaega. O le molimau a le susuga Letaulau Mataafā AM i lona soifua faaleagaga, na faavae i Upu a le Failauga, *“a o le'i faamaluina le maea ario, po o ta'e le ipu auro, po o nuti le kate i le vaipuna, po o gausia le mea taavili i le vai'eli...”* na ia ta'ua ai le Tina ia Lefiu sa faatili i ai le laumea, ma saili i ai le tofa, a Komiti a Tina o le Afioaga, faapea le Mafutaga Tina o le Ekalesia. O se tina e fiafia ma to'aga i sauniga lotu i Aso Sa ma soo se sauniga a le Nu'u, Pulega ma Matagaluega. O Aso Sa Tina i tausaga taitasi e tula'i e molimau i le alofa o le Atua, e tauloto Salamo ma Tusi Paia, fai ma tatalo. E ui ina ua gausia le mea taavili, ae ua mapu atu lona agaga i lona Atua sa faatuatua ma auauna i ai. Na fa'aaoga e le Failauga ia Uilipefosi le TFA ma le manatu autu - Vaai Manino, e faavae ai le Upu faamafanafana mo le fanau ma le aiga. O le faamaloloina e Iesu o le tauaso i Lona pa'i faalua, e le ona ua vaivai le mana o Iesu, ae ona o le vaivai o le pupula o le faatuatua a le tauaso, o soo o Iesu, o le au faresaio ma tusiupu. Sa molimau foi Uili i lona masani lelei ma lenei tina ia Lefiu ma lona tausaaafia mataala i ona tiute fai i totonu o le Pulega, e iloa ai se tina e manino lelei lana vaai faalefaatuatua i lona Alii o Iesu. O se lu'itau mo le fanau, ina ia 'aua le nofoa'i i Petesaita - le nofoaga faatusa o le tauaso faaleagaga - ae ia manino la latou vaai i le soifuaga faatuatua o lo latou tina, e fa'aauau ma solisoli muliaao ai. O le susuga Toeaina ia Leaso, na faavae lana molimau faaopoopo i Upu o le Faataoto, *“O le matagofie e pepelo lea, o le mea faatauvaa le lalalei; a o le fafine ua mata'u i le Alii, e viia lava o ia.”* Sa la'ua Komiti Feau Eeseese faatasi ma le afioaga Sālū Finau, taimi na faamanatu ai le 150 tausaga o Malua (1994). Na ia molimauina ai le aiaili o Lefiu ina ia 'aua nei i ai se faaletonu, i le tauaveina o le tofi o lona alii. E oo i Fono i Malua, ua lauiloa lenei tina i lona mataala ia lelei le tautuaina o le aufaigaluega paia a le Atua. Na faai'u ona toe sauniga i lona oliolisaga tumau i lona aiga, ma faamavae atu ai. Tofa Lefiu, ulufale atu ia, i le fiafia o lou Alii. *Saunia: Faatonu Sulu*

AVAVILI MAUIGOA TUPUOLA

(31/3/1946 - 27 MATI 2021) 74+11+28

“Ua ou tau le taua lelei, ua i’u ia te a’u le tausinioga, ua ou taofi i le faatuatua.” 2 Timo.4:7

O Avavili o le Tina matua o le EFKS Lotofaga, Pulega Lepa ma Lotofaga. Na soifua mai o ia i le Aso Sa, 31 Me 1946 ae valaauina e lona Matai i le Aso Toonai 27 Mati 2021, ua 74 tausaga 11 masina 28 aso le matua o lona soifua. O ona tua’o o Tupuola Liaina (Saaga, Siumu) le tama, ma Pemoe Tupuola i Lotofaga le tina. Na faaipopo atu ia Sualupe Matu’u Mauigoa o Falelatai. E to’o 4 le fanau, 12 le fanau a fanau (to’o 2 teine na maliliu i le Sunami 2019), ae 3 fanau a fanau a fanau, e 19 e na tutupu mai i le tina ina ua maliu. E tele aso na faataotolia ai o ia i lona aiga ona o lona gasegase, ma e ui ina tele togafitiga na saili i ai, ae na i’u ina to lana manava ma moe filemu ai i lona aiga i Lotofaga.

O ona toe sauniga na faia i le Aso Lulu, 7 Aperila 2021 a o faagasolo le palota a le atunuu. O le susuga i le Toeaina ia Iosefa Atapana Uilelea FT, le Faafeagaiga Taulagi a le afioga Sa’o Faapito ma le Aiga paia ia Salevalasi, na ia muamua fai le Tatalo ma aveeseina mai ai le tino maliu o le Tina mai le Fale Maliu i Apia ma momoli atu ai i lona aiga i Lotofaga. Na faia le uluai sauniga i lona aiga ina ua taunuu, na ta’ita’i lava le susuga i le Toeaina ia Iosefa Uilelea FT, Tatalo le susuga Kirisimasi Senifili o le Ekalesia Faapotopotoga a le Atua i Lotofaga, a o le Upu faamafanafana na saunia e le afioga i le Tiakono Katoliko Lotofaga ia Penitito Palea’i. Mulimuli ane ona faia lea o lona toe sauniga i le malumalu o lana Ekalesia pele sa tapuai ma auauna ai i le Atua, le EFKS Lotofaga.

O le afioga lava i le Sui Taitaifono o le Fono Tele 2021 na ia taitai le toe sauniga. O le susuga faafeagaiga EFKS Vavau ia Susuga Alesana FS na ia faaulufale le sa o le tina, o Penitito Palea’i TK na faia talosaga, a o le susuga Kirisimasi Senifili AOG na faia le lauga faamafanafana. Na molimau lana ulumatua o Mekala Faapoi Tainano ma se tasi ona uso fai ma sui o le fanau, a o le afioga ia Teoteo Gatai (A’oa’o Fesoasoani EFKS Eva) o le sa’o o le aiga na molimau fai mo latou sui. Na latou molimau i se tina alofa ma le faamaoni i lana fanau ma lona aiga, e tautua le leoa ae fai mea lelei ina ia manuia le

atiina a’e o lana fanau ma upu fai o lona aiga. O le molimau a le susuga i le Toeaina ia Iosefa Uilelea FT i lona soifua faaleagaga na faavae i upu a le aposetolo, *“Auā afai tatou te ola, tatou te ola mo le Alii, pe afai e oti, e oti mo le Alii; o lenei, pe ola pe oti i tatou, o tagata lava o le Alii i tatou.” Roma 13:8.* La te taunuu atu i le galuega i Lotofaga i le tausaga 1989, o Avavili le tasi tina sa nafa ma le tausiga o le Maota o le Galuega e susū ai le Faafeagaiga taulagi a Fiamē ma Salevalasi (o le isi tina e suafa ia Siitū Asini). O le auaunaga sa silasila i le soifua lelei ma maloloina o le auauna a le Atua i aso taitasi, ae maise i aso faapitoa ma pe afai e malotia le maota. O le Tina o le galuega na te faatonu ma faasino atu nisi mea, ae o le tele lava o tiute sa faatino lava i le potu ma le atamai faatina ua masani ma ona nafa i lona aiga. O le matagofie, tūmamā ma saogalemu o le lotoifale o le maota, o le soifua lelei o alo ma fanau a le faifeau, ae maise le aufaigaluega ma malo asiasi atu, e le mafai ona faaletonu lenei tina. E tautua fiafia, auauna lelei ma mae’ae’a, e faamaoni ma alofa moni. O le tausiga o le Fono Tele i Malua ua molimauina e le Pulega lana tautua matavela (e ui ina faalavelave lona usupō i nisi taeao). O malologa a le faifeau ta’i 3 masina, e ave ai ma Avavili, e le malolo lana tautua mo le Toeaina ma le aiga. E le’i fesili Avavili mo se tau, poo se mea e mana’o ai mai le faifeau, i aso uma o lana auaunaga i totonu o le maota, se’ia vagana ua na lagona ua le atoa lona malosi, na seetuagalu ai i lona aiga. Ua tonu ma talafeagai le afioga a le Atua i lenei auauna, pe ola pe oti, o le tagata lava o le Alii o ia. E valaau lona Matai o faapea ona ia fai. Le auauna lelei e, ma le faamaoni, ulufale atu ia i le fiafia o lou Alii.

Ua fetau lelei foi mo ia le manatu autu o lea aso - *Tapenaga mo le Tau Toe Totogo a’e.* Auā o lana tautua faamaoni mo Iesu e ala i lana Faifeau ma lana Ekalesia a o ola o ia, o lana lea tapenaga ma lona oso, i lana malaga ua fai nei i le nuu ma le aiga moni i le Lagi. Ua uma le tau mālūlū, o faigata o lenei lalolagi ma le pogisa o le tuugamau, ua totogo a’e le taeao ma le aso fou o le Toetu manumalo o Keriso, na te aumaia le moemoe fou mo le tagata faatuatua faamaoni, e le gata i e ua oti, ae faapea foi le faamafanafanaina o i latou o ola pea. Na faai’u ona sauniga i lona aiga o lagomau ai. Tofa Avavili, ia viia lou Alii i lou soifua ma lau tautua faatuatua. *F.Sulu.*

O E UA FAI I LAGI FOLAUGA

LĒFIU SĀLŪ FINAU



FAOASAU IOSEFA MOKE



TOGO'I LEASI TUPA'I MOSE



Andrew Laufiso FS, Caesar Samuelu FT, Julius Fruean FS, Lenatali Fruean, Faleupolu Laufiso, Utulasi Samuelu